

LETARE CENCE DESTINATARI

Mi àn invidât a di ce ch'o pensi de letare pastorâl dal vescul Battisti: “Una Chiesa profetica per la pace nel mondo”. Lu fâs malvulintîr, come ogni volte ch'al fevele il gno vescul, parceche cuanche o tachi a lei, o sint a viergimi il cûr a grandis sperancis e, cuanche o rivi dapît mi cjape un sens trement di delusion e di rabie par un'âtre ocasion strassade.

Chestis lis mês osservazions.

La letare le àn presentade in duc' i pulpiz come “profetiche”. O preferissares che la professie no fos scrite su la tichete o sul reclam, ma che si le palpas a colp, tal prodot. Al è facil ingrumâ un agjetif sore chelâtri; al è plui dificil mertâsai. E chest al è di fonde tun document di Glesie, là che al à di valê plui il contignût che no la facade.

Ma parcè mo dute cheste concordance su la “profeticitât” de letare?

O crôt prin di dut pal stîl dut personâl e incjantadôr dal vescul Battisti. Al è clâr che certis espressions pluitost fuartis, certis interpretazions fûr dal solit cerz mûz di tornâ a lei la storie in clâf critiche e àn dut il savôr e l'odôr de professie. In chest la letare e à un so valôr. Parceche e torne a lei la bibie e la storie tun mût che no si ere usâz a sintî.

O soi sigûr che j zove unevove, a Battisti, il fat di jessi un falcuç, ancje se no masse sgrifignôt tune sdrume di colonbis o di gialinis splumadis. Nol vares di sei cuissà ce dificil, in di di vuè, rivâ a fâsi un non tal sejap scrodeât dal episcopât talian.

Ce che plui mi fâs impression, in cheste letare pastorâl, e jè la mancjance di ogni prospietive. No vin di dismenteâsi che si trate di un vescul che j fevele ‘e sô glesie. Poben, cun dute la plui buine volontât di chest mont no rivi a cjatâ un sôl toc ch'al feveli in maniere concrete e direte ai cristians de diocesi di Udin, che Battisti al è pastôr. Chì si è a nivêi planetaris e superplanetaris, là che i problemis concrez di une Glesie locâl e di un teritori, sul cont de pâs no son nancje sfilâz. Il non “Friûl” lu ài vût let te presentazion (e duncje fûr dal test) e a pag. 71, là che si fevele di un volontariât di fantatis. E une peraule sui operâris de Danieli di Bûri in ocasion di une conferense. Concludi che la letare e jè “pôc” calade te realtât di chenti, là che l'azion di un vescul e pò e a à di lassâ il so segnâl, al è za jessi avonde lars.

Si puèdial fevelâ de pâs, in Friûl, cence nancje vê indiment i cunfins orenz che nus dividin dai nestris fradis di fede e di storie tal grim di Aquilee, glesie mari di popui che, te diversitât des lenghis, e àn savût vivi la pâs in maniere concrete e profetiche?

Si puèdial fevelâ de pâs in Friûl, cence fevelâ dal jôf des sclavitûz militârs che nus sciafoin e ch'a condizionin in negatîf ogni possibilitât di svilup (“âtri non de pâs”) e che no puartin di sigûr daursi un mes di pâs?

Si puèdial fevelâ de pâs in Friûl, cence denunciâ la injustissie de emigrazion, dal scugnî lâ di centenârs di miârs di furlans, che àn scolade di sanc la nestre tiere, sfurninle di chês fuarcis lavorativis, culturâls e creativis che un popul al scuen par fuarce muri cuanche no lis à plui?

Puèdial il vescul fâ di mancûl di tirâ fûr il fat vergognôs e di no rivâ a cròdilu, che pal Stât talian il nestri popul uficialmentri nancje nol esist? L'art. 6 de Costituzion al fevele di tutele des minorancis. Ancje chest al è un segnâl di justissie, strade de pâs. Poben il Stât talian nol è dome bulo tal rivâ a plaçâ lis sôs armis atôr pal mont; si fâs un bon onôr ancje tal folpeâ lis minorancis

Là si cjàtie te letare pastorâl, une peraule su lis zonis di mont ch'a son daûr a muri e no par colpe dai SS 20 rus e dai Pershing e dai Cruise merecans ma par sieltis politichis e economichis pensadis e voludis, contrariis al ben de int?

La professie no jè dome tal dinus là ch'al larâ il mont se Reagan al metarâ in vore il so progjet di "vueris stelârs" o se i "grancj" a laran dilunc cu la lôr corse mate viers de catastrofe atomiche. Nol covente un voli di catôr par viòdilu e nancje no une assistense speciâl dal Spirtu Sant. Invessit il don dal Spirt al covente par denunciâ la politiche di muart che si sta puartant indenant te culture, tal teritori, tal tiessût antropologic furlan. E chî il profete nol pò jessi vuarbìcul o distrât. Par chel o dîs che la letare no mi plâs e che no jè gran profetiche. Parceche e rivarâ adore di fâ ingjaulâ cualchi gjerarche o cualchi nostalgic, ma no nus zovarâ di sigûr a creâ une culture di vite tun Friûl ch'al mûr. E no dome par colpe dal abort.

Alore o preferis il document "Furtunâz chei ch'e puàrtin la pâs" dât dongje dal grop di studi "Glesie locâl", mancul panoramic ma unevore plui concret e "profetic". Ancje se nol salte, fûr nancje te bibliografie de letare dal vescul.

Un document come chel chî, mùcul disincjarnât, al devente alore par fuarce ancje stonât. Parceche j mancje dibot dut come letare di un vescul 'e "sô Glesie" e nol à autorevolece a di chêl nivel ch'al è stât scrit. Ce puèdial zovâ in concret, pal mont intôr, ce ch'al pense il vescul di Udin su la cuistion grivie de pâs e de vuere? Un document come chel chî al vares vût di sei butât fûr di une autoritât plui alte o plui slargjade (par esenpli, di dute la senblèe dai vescui), par che dopo ogni vescul lu calas te Realtât de sô Glesie.

Cussì come ch'al è stât pensât al è dome la teorizacion dal pinsîr di bons. Alfredo Battisti sul teme de pâs. E l'ANA j met sot dal nâs, a colp, il judissi juste contâr che il pape al à dât a Aoste, là ch'al à dit che la vuere di difese e jè juste. E Bonicelli, vescul militâr, al à un bon rinpîn par dî che une sisile, ancje s'a sorne sul cîl furlan, no fâs rivâ la vierte.

O speri di podê scrivi miei cuanche il gno vescul al fevelarâ in concret des cuestions de pâs caladis te nostre Realtât, compagnant magari la sô vôs cun gjesc' di libertât ancje dentri de sô e de mê Glesie. E la sô int di sigûr no j dînearâ une man.

Visepente, ai 25 di fevrâr dal 1987 - tal 14ⁿ anniversari di nomine dal vescul Battisti.

pre Antoni Beline, plevan